



Samewirkende Limburgse Vastelaovesvereniging

Versjlaag uëver 't verenigingsjoar 01-04-2017 t/m 31-03-2018

Doelsjtelling

De doelsjtelling van de SLV is 't in sjtand haote en bevordere van de vasteloavend es uting van leëvende volkskultoeer en folklore in Limburg en doadurch ee beidrage levere aan 't kultoeereel en maatsjappelik leëve in ós provincie; dit mit respek vuur de egeheëd van de durch de lidvereniging plaatsjelijk beoefende Vasteloavend.

Dit wilt de SLV bereike durch 't bevordere van de óngerlinge samewirking, 't versjtevige van de óngerliggende bank, 't oetrike van óngersjeiinge, 't samewirke mit anger organisaties en 't óptreëne es uëverkoepelend orgaan.

Lidvereniging



De Samewirkende Limburgse Vastelaovesvereniging weëde gevurmd durch zïevetieën vereniging, de grote, traditierieke sjtadvastelaovesvereniging va Limburg. Dizze vereniging voldoeë aa de criteria zoe-wie die zint vasgelag in de sjtatute. Dizze zïevetieën vereniging zint: de Aanhawwersj oet Meersje, de Baeker Pottentaote oet Baek, 't Bombakkes oet Gennep, Burgerlust oet Egelse, 't C.C.H. oet Gebrook, de Flaarisse oet Gelaen, V.V.G. Jocus oet Venlo, de Kirchraötsjer Vasteloavends Verain oet Kirchroa, de Marotte oet Zittert, de Mirlitophile oet Valkeberg, V.G. D'n Oeles oet Tegele, de Piëlhaas oet Venroj, de Rogstakers oet Wieërt, de Steinder Bök oet Stein, de Tempeleers oet Mestreech, d'n Uul oet Remunj en de Winkbülle oet Heële.

Besjermheer van de SLV is de Gouverneur van ós Provincie, d'n heer Theo Bovens. In 't afgelopen seizoen vierde D'n Oeles haar 6 x 11 jarig jubileum.

D'n Oeles hat dizze verjoardag mit versjillende activiteite, wo ónger ee reseptie, in hun ege gemeensjap gevierd.



Pos

In 't verenigingsjoar 2017-2018 zint mit de papiere pos 27 sjtukke binnegekómme en 38 sjtukke versjik. Uëver de mail zint 53 posstjukke binnegekómme en 42 mails es benuëdigd antwoad gesjik.



Mailverkier mit de vereniging en 't besjtuur hat inkómmend 1.166 kieër plaatsjevónge en 954 mails zint oetgeganget.

't Besjtuur hat ee groepsapp woarmit sjnel gesjakeld kint weëde. Doomit zint in 't afgelopen seizoen 623 berichte gesjik.



Besjtuur SLV

In 't aafgelope verenigingsjoar hat de SLV aafsjeid genómme van Paul Leenen, Ceremoniarius. Vier danke him vuur zinne izat vuur de Limburgse vasteloavend. Doomit besjtóng 't besjtuur nog oet Raymond Vlecken: president/veurzitter, Paul Göttgens: sikkertaris, Frits Dirks: penningmeester, Bart Faassen: lid en Max Ruiters: lid.



Vöal te sjnel höbbe vier aafsjeid mótte numme va Tenny Tonen. Ósze oad-sikkertaris is óp d'r 26^e mei óp 63-joarige leëftied gesjtörve. Dit is bei 't besjtuur en de lidvereniging hel aagekómme. Vier zulle zien wöad, so wie "ollie" goan misse.

't Besjtuur vergaderde moandeliks mit oetzundering va de moand juli. Óch is in 't aafgelope joar 't vuurzittersuëverlek geweër in Wieërt, Meersje en Klumme. Hei zint punte oet gekómme die in de algemeine ledevergaderinge zint besjproake.

Extra bei-eekómste zint geweër mit 't besjtuur en óch individule besjtuurslede in vuurbereijing van 't 5 x 11-joarig jubileum van de SLV en i vuurbereijing van de Gouden Narrenkap i Tegele mit D'n Oeles.

Óch woar aa 't eind va meëts 't uëverlek uëver de Gulden Humor mit lede va de Broedersjap, de Aanhawwersj as aafgevaardigde va de vereniging en de KV Burgerlust as organisator va de Gulden Humor 2018.

5 x 11 joarig jubileum

Durch óp d'r daag va de oetreiking van de Gouden Narrenkap ee fieësteligke vergadering te haote, woëd 't weliswoar ee hieële lange daag, mer in zing gehieël óch ee fieësteligke daag. De SLV-vergadering sjtarte sjmöriges mit ee óntvangs van alle vereniging en de vöale gaste in 't Sjuttereiumuseum i Steyl.



Ee sjtukske historie woëd gegeve en d'r Fèr Kousen goof ee ege drieën aa d'r SLV en de vasteloavend in 't algemeen.

De jubileumpin woëd geprissenteed en oetgerik a de vereniging en gaste. 't Gesjenk va de SLV woar vuuroetlopend óp ee definitief boek ee Handreiking uëver óptochte. Mit name de veiligheid ronk die óptochte en wie die gewaarborgd kin weëde.



Óngersjeinge

In dit verenigingsjoar is vól gebroek gemak va vuurdrachte vuur óngersjeinge.



't Besjtuur zelf hat Paul Leenen benumd tot lerebesjuurslid. Die óngersjeing hat Paul óngerwiel d'r fieëstelijke jubileumvergadering óntvange.

Guy Bannier va de Tempeleers is benumd tot lereid va de SLV.

In 't seizoen zint 14 Orde va Verdeenste oetgerik en 3 kier ee Zilveren Buut.



NEG

't Congres va de Närrischen Europäischen Gemeinschaft woar 't aafgelope joar i Remunj. Ee gevarieerd program en goode vergaderinge mit aafsjetend een diner. Dizze NEG-Jahrestagung woar va 22 t/m 24 september.

I vuurbereijing va de Jahrestagung zint met de BCL ee aantal vergaderinge geweër um d'r daag succesvol te make.

Externe kontakte

't Besjtuur va de SLV wilde geer mieë bei de vereniginge kómme. Dat is enerzijds gebuëd durchdat de vereniginge mieë ordes höbbe aagevraagd. Angerzijds wilde 't besjtuur geer in 't seizoen ee aantal evenemente bezeuke. Dat woar meugelik bei 't oetrike van de ordes mar óch durch speciaal ee evenement van ee vereniging te bezeuke.

Óch woare er oetnuëdiginge vuur de 11^e va de 11^e óp 't Vriethof, de Limburgse Daag i Herenhelderen va Liveke, de neujoarsóntvangs va de Provincie, de Buuttekampioensjappe in Remunj, de presentatie va de vasteloavesposter i Heële, de 53^e Diesviering va de NUL i Mestreech, 't LVK i Kessel, 't KVL i Ruiver en 't Knoevelemint va de Provincie woa vól SLV-vereniginge woare.

Vanoet de vereniginge woar 't besjtuur oetgenuedigd bei en is gegange noar de installatie va Vorst Stan Ockers i Wieërt. 't Euregionaal Prinsentrefte i Gennep (tevens oetrike Orde va Verdeenste aa Ton Peeters), de joarvergadering va de Tempeleers (tevens oetreiking lereidmaatsjap Guy Bannier), 't Prinseoetroppe bei CCH (tevens oetreiking Orde va Verdeenste aa Rolf Römgens en John Mertens), reepsie Sjtadsprins Roger II va Heële (sjponsor va de SLV: Wiertz), Knipa meets Ploum i Heële (organisatie durch de KVV en De Winkbülle). Óp carnavalszoaterdag bezóch ee delegasie va 't besjtuur 't Kanon van 't Balkon i Zitterd.



Gouden Narrenkap

Laureaat

De Gemeente Venlo hat Wiel Vestjens vuur ee uëverlik oetgenuëdigd in 't gemeentehoes. Same mit zien Annie woëd heë verras durch 't besjtuur va de SLV mit de mededeling dat heë de laureaat va 2017 is



vuur de Gouden Narrenkap. De organisatie loog bei D'n Oeles, die hun 66-joarig jubileum houwe aangegrieëpe um 't fieëst va de Gouden Narrenkap te organisere. Wiel Vestjens houw ee prachtig palmares van vöale bekinde leedjes en de oetverkezing woar doarum óch mieë dan verdeend.

D'r daag va de Gouden Narrenkap

Dizze daag woëd óp zoadesjdig d'r 25^e november i Tegele gehoate. Na de fieësteligke vergadering van 't 5 x 11-joarig jubileum va de SLV woëd geluncht en góng ee deel va de genuëdigde noar de Moas um mit ee boot Wiel Vestjens óp te hoale

i zien Venlo. Heë en de vereniginge woare verras uëver dizze besongere tour.



Trük i Tegele woar vuur 't Sjuttereimuseum ee ontvangs duurch D'n Oeles. In 't museum woëte de vereniginge óggerope en onger hunne ege moeziek noar 't podum gebrach durch de meëdjes va D'n Oeles. Óch de gaste woëte begroet so wie de besjirmheer va de SLV Gouverneur Theo Bovens en de Gedeputeerde Ger Koopmans en d'r burgervader va Venlo, d'r heer Anton Scholten.

In aasjleting doaróp woëd de laudatio vuurgedrage woar noa d'r Wiel Vestjens de Gouden Narenkap kreeg opgezat en de beibehuërende oorkonde oetgerik kreeg. Bei 't



zieë va de film uëver Wiel Vestjens begrieëp jieëkerinne pas ech wat dizze man vuur de vasteloavend hat betekend.

's-Oavends woar ee groeët fieës i Cultureel Centrum De Haandert i Tegele. Doa kreeg d'r Wiel ónger 't oog va alle vereniginge nogins de Gouden Narrenkap oetgerik.

Alle vereniginge höbbe d'r Wiel gefilleseteerd óngerwiel ee besjloate receptie.

De complemente gónt oet noa D'n Oeles vuur de geweldige organisasie. Mede doadurch woar 't ee fantastische daag vuur Wiel Vestjens en de vöale gaste.



Wie erg is 't dan dat d'r Wiel Vestjens neet lang hat kinne geneëte van zien Gouden Narrenkap. Óp d'r 16^e jannewaar va dit joar is heë ópins gesjtórve en hant vier óp d'r 20^e jannewaar aafsjeid van him genómme i Venlo. Óch is in 't afgelopen seizoen d'r Frans Haselier oet Kirchroa gesjtórve. Óch heë woar Gouden Narrenkapdrager.

Sjponsore

Sjponsore zint noeëdzakelijk vuur 't vuurbesjtoan van ee vereniging. 't Is muilik sjponsore te vinge en d'r penningmeester is same mit de rest va 't besjtuur óp zeuk noar nuie sjponsore. Enkele name zint al gevalle en zulle benaderd weëde. Angerhoave week vuur de vasteloavend zint de sjponsore verras mit ee groeëte kook va bekkerei Frits Mennens oet Baek. Dank aa Boels Rental, Brand Bierbrouwerij, Kembit, Thetru en Wiertz Personeelsdiensten vuur de óngersjteuning.



Letsendlich

't Woar dudelig ee seizoen mit ee lach en ee troan. 't Hool ós bewus va de betrekkelikheid va 't leëve. Evvel 't blief geneëte va al wat binne ónze vereniginge gebuëd en doa heure noe eemoal ee lach en ee troan bei.

Vier blieve ós izette um same mit de lidvereniginge de Limburgse Vasteloavend i sjtand te hótte as cultureel erfgoed va ónze Provincie.

Heële, april 2018, Paul Göttgens

Geakkordeerd te Zitterd op maandig d'r 28^e mei 2018

Raymond Vlecken, *president*

Paul Göttgens, *sikkertaris*

